



INFORME SECTORIAL DE AUGAS DE GALICIA

ASUNTO: SOLICITUDE DE INFORME DO ESTUDO DE IMPACTO AMBIENTAL DO PARQUE EÓLICO SERRA DO FARO AMPLIACIÓN II (EXPEDIENTE IN408A/2020/17).

UBICACIÓN: CONCELLOS DE RODEIRO, DOZÓN (PONTEVEDRA), PIÑOR E SAN CRISTOVO DE CEA (OURENSE).

SOLICITANTE: SERVIZO DE ENERXÍAS RENOVABLES E EFICIENCIA ENERXÉTICA DA DIRECCIÓN XERAL DE PLANIFICACIÓN ENERXÉTICA E RECURSOS NATURAIS DA VICEPRESIDENCIA SEGUNDA E CONSELLERÍA DE ECONOMÍA, EMPRESA E INNOVACIÓN.

PROMOTOR: PENA DA COSTA EÓLICA, S.L.

OBXECTO

O obxecto deste informe é dar resposta á solicitude do 19 de febreiro de 2021, do Servizo de Enerxías Renovables e Eficiencia Enerxética da Dirección Xeral de Planificación Enerxética e Recursos Naturais da Vicepresidencia Segunda e Consellería de Economía, Empresa e Innovación, referente á obtención de informe dentro das competencias de Augas de Galicia, sobre o Estudo de Impacto Ambiental do Parque Eólico Serra do Faro Ampliación II, nos concellos de Rodeiro, Dozón (provincia de Pontevedra), Piñor e San Cristovo de Cea (provincia de Ourense), de xuño de 2020, en cumprimento do establecido nos apartados 2 e 3 do artigo 37 da Lei 21/2013, do 9 de decembro, de avaliación ambiental.

O documento sometido a informe, ten como obxecto a realización do Estudo de Impacto Ambiental do Parque Eólico Serra do Faro Ampliación II, promovida por Pena da Costa Eólica, S.L., e localizado nos concellos de Rodeiro, Dozón, Piñor e San Cristovo de Cea, nas provincia de Pontevedra e Ourense.

ANTECEDENTES

A Comunidade Autónoma de Galicia regulou o aproveitamento da enerxía eólica mediante a Lei 8/2009, do 22 de decembro, pola que se regula o aproveitamento eólico en Galicia e créanse o canon eólico e o Fondo de Compensación Ambiental, publicada no Diario Oficial de Galicia número 252 do 29 de decembro de 2009.

Esta Lei foi modificada coa aprobación e entrada en vigor da Lei 5/2017, do 19 de outubro, de fomento da implantación de iniciativas empresariais en Galicia, que simplifica o procedemento para a obtención da autorización administrativa.

Con base neste novo marco normativo, Pena da Costa Eólica, S.L. pretende, na súa calidade de promotor do proxecto do Parque Eólico Serra do Faro Ampliación II, situado nos termos municipais de Rodeiro, Dozón (provincia de Pontevedra), Piñor e San Cristovo de Cea (provincia de Ourense), a obtención de autorización administrativa para este proxecto.

Dado que o proxecto debe de ser sometido a un procedemento de avaliación de impacto ambiental ordinario, Pena da Costa Eólica, S.L., contratou a Adantia, S.L. para a redacción do Estudo de Impacto Ambiental.

O 19 de febreiro de 2021, a Vicepresidencia Segunda e Consellería de Economía, Empresa e Innovación publicou no DOG Nº 34 a resolución do 5 de febreiro de 2021, da Dirección Xeral de Planificación Enerxética e Recursos Naturais, pola que se someten a información pública a solicitude de autorización administrativa previa, a autorización administrativa de construción, o





estudo de impacto ambiental e o proxecto sectorial de incidencia supramunicipal das instalacións do parque eólico Serra do Faro Ampliación II, emprazado nos concellos de Rodeiro, Dozón (Pontevedra), San Cristovo de Cea e Piñor (Ourense), promovido por Pena da Costa Eólica, S.L. (expediente IN408A 2020/17).

LEXISLACIÓN APLICABLE

- Real Decreto Legislativo 1/2001, do 20 de xullo, polo que se aproba o Texto Refundido da Lei de Augas (en diante TRLA).
- Regulamento do Dominio Público Hidráulico, aprobado por Real Decreto 849/1986, do 11 de abril (en diante RDPH).
- Lei 9/2010, do 4 de novembro, de Augas de Galicia.
- Decreto 1/2015, do 15 de xaneiro, polo que se aproba o Regulamento da planificación en materia de augas de Galicia e regúlanse determinadas cuestións no desenvolvemento da Lei 9/2010, do 4 de novembro, de Augas de Galicia.
- Real Decreto 11/2016, do 8 de xaneiro, polo que se aproba o Plan Hidrolóxico da Demarcación Hidrográfica de Galicia Costa (en diante PHGC).
- Directiva 2007/60/CE do Parlamento Europeo e do Consello, do 23 de outubro de 2007, relativa á avaliación e xestión dos riscos de inundación.
- Real Decreto 903/2010, do 9 de xullo, de avaliación e xestión de riscos de inundación.
- Real Decreto 19/2016, do 15 de xaneiro, polo que se aproba o Plan de Xestión do Risco da Inundación da Demarcación Hidrográfica de Galicia – Costa.
- Directiva 2000/60/CE do Parlamento Europeo e do Consello, do 23 de outubro de 2000, pola que se establece un marco comunitario de actuación no ámbito da política de augas.

ANÁLISE DA DOCUMENTACIÓN

A documentación aportada para o presente informe é o **“ESTUDIO DE IMPACTO AMBIENTAL PARQUE ÉOLICO SERRA DO FARO AMPLIACIÓN II”, de xuño de 2020**, realizado por un equipo multidisciplinar de Adantia, S.L, dirixido tecnicamente polo Licenciado en Bioloxía Jordi Solans Oste que inclúe unha memoria con anexos (A.- Fotográfico; B.- Descrición e cartografía de hábitats; C.- Fauna; D.- Estudo de impacto e integración paisaxística; E.- Estudo de predición acústica; F.- Turismo; G.- Análise do efecto parpadeo; H.- Arqueoloxía; I.- Identificación e valoración de impactos; J.- Plan de restauración) e planos. Todo elo en formato dixital (pdf).

A continuación describíense brevemente as obras do parque eólico segundo a documentación aportada.

Os terreos onde se pretende instalar o Parque Eólico Serra do Faro Ampliación II están localizados nos concellos de Rodeiro, Dozón, Piñor e San Cristovo de Cea, nas provincia de Pontevedra e Ourense. Este parque de 33,6 MW de potencia total estará integrado por un total de 8 aeroxeradores de tres pas con un diámetro de rotor de 136 m, 4,2 MW de potencia nominal unitaria e 112 metros de altura de buxe. Ademais proxéctase unha subestación eléctrica que terá a condición de subestación colectora para o Parque Eólico Serra do Faro Ampliación II e o Parque eólico Serra do Faro (Fase I) con número expediente IN661A 2011/02-





03- AT. Ambos os parques comparten punto de acceso e conexión á rede eléctrica de transporte no nó Beariz 400 kV e instalacións de conexión.

A subestación será de tipo intemperie, con sistemas de tensión 132 kV e 30 kV, configuración de simple barra e dotada dunha posición de liña e dúas posicións de transformador de potencia de relación 132/30 kV (unha delas con carácter de posición de reserva). Proxéctase un único transformador de potencia aparente nominal 70 MVA (ONAF), común para a conexión dos parques citados.

Cada aeroxerador xera enerxía a 720 V, a cal se eleva a 30 kV nos centros de transformación con relación de transformación 720/30.000 V e potencia aparente 4.700 kVA que hai aloxado no interior de cada aeroxerador. A evacuación da enerxía eléctrica xerada efectúase mediante unha serie de liñas subterráneas a 30 kV, que agruparán os centros de transformación de varios aeroxeradores cara á subestación de transformación.

As coordenadas UTM (F29 ETRS89) dos aeroxeradores que compoñen o parque son:

Coordenadas aeroxeradores Parque Eólico Serra do Faro Ampliación II			
Nº Aeroxerador	X-UTM (F29 ETRS89)	Y-UTM (F29 ETRS89)	Termo Municipal
1	586.630	4.714.850	Rodeiro
2	587.066	4.714.830	Rodeiro
3	585.813	4.714.004	Rodeiro
4	586.206	4.713.859	Rodeiro
5	586.551	4.713.755	San Cristovo de Cea
6	582.458	4.714.071	Dozón
7	583.632	4.714.066	Dozón
8	582.851	4.713.522	San Cristovo de Cea

A subestación queda delimitada polas seguintes coordenadas dos vértices da súa plataforma:

Coordenadas subestación colectora			
Nº Vértice	X	Y	Termo Municipal
A	586.431	4.712.647	San Cristovo de Cea
B	586.514	4.712.620	San Cristovo de Cea
C	586.499	4.712.573	San Cristovo de Cea
D	586.415	4.712.599	San Cristovo de Cea

O acceso aos aeroxeradores número 1 e 2 do parque proxéctase a partir da estrada EP-6202, que une Rodeiro con San Cristovo de Cea, desde un alto situado a un quilómetro ao norte do



núcleo de Pobadura. O acceso aos aeroxeradores 3, 4 e 5 parte desde a mesma estrada, nun punto situado ao comezo do desvío que conduce a Pobadura.

Para chegar ao acceso dos aeroxeradores 6, 7 e 8 se parte da estrada EP-6101, á altura do lugar denominado "Coto da Besta". Desde este punto nace, en dirección nordés, unha pista asfaltada que conducirá, un quilómetro máis adiante, ao vial de acceso dos devanditos aeroxeradores.

A obra civil que se proxecta inclúe:

- Accesos e viarios interiores.

Téntase minimizar o número de viarios de nova creación, aproveitando o trazado dos camiños e pistas xa existentes mediante o seu arranxo e posterior utilización, contemplando sempre unha anchura mínima dos viarios de 6 metros.

Naqueles tramos nos que non se poida empregar a traza dos camiños existentes, procurarase que os novos viarios discorran en desmante aberto, evitando en todo momento a realización de trincheiras, ou, onde sexa posible, a media ladeira, empregando produtos do desmante para compensar volumes na medida do posible. Naqueles tramos nos que a pendente sexa elevada estenderase unha capa de formigón de limpeza sobre o viario.

Para a evacuación da auga das cunetas realizaranse obras de paso, consistentes en tubos de PVC de 500 mm de diámetro embebidos en formigón en masa, colocados transversalmente baixo a calzada, completándose en ambas as cunetas con obras para a recollida e evacuación de auga.

- Cimentación para ancoraxe das torres.

A cimentación proxectada é de tipo superficial illada consistente nun pedestal metálico que se embebe nunha zapata de base octogonal e canto variable. O pedestal está conformado por un anel de aceiro de ancoraxe que queda embebido en formigón dentro da zapata.

- Plataformas de montaxe e áreas de ocupación temporal

Con carácter xeral, o proceso construtivo de tales áreas adoita ser de sinxela execución, limitándose a procesos de despexe e roza, e posteriores compactacións, das superficies resultantes, mediante rodetes compactadores de 12-14 Tn.

En determinados casos particulares e debido á topografía da localización dun determinado aeroxerador, a área de manobra pode levar implícitos movementos de terras de certa envergadura.

Dispoñerase dunha zona de ocupación temporal, despexada e de dimensións aproximadas 20x65 m² para a descarga, provisión e preparación das pas previamente ao seu izado. Esta zona prevese contigua a cada unha das plataformas de montaxe.

Ademais, contarán as instalacións dunha zona de ocupación temporal, despexada e de dimensións aproximadas 13x40 m² para a descarga, provisión e preparación dos tramos de torre previamente ao seu izado. Esta zona tamén se prevé contigua a cada unha das plataformas de montaxe.

Tamén dispoñerase dunha ou varias zonas de ocupación temporal, destinadas ao montaxe e desmontaxe do guindastre de celosía, cunha lonxitude aproximada duns 114 m rectilíneos e un





ancho aproximado de 7 m. Adicionalmente, reservaranse dúas zonas contiguas de 105 m² de superficie cada unha, para a localización de pequenos guindastres auxiliares que axuden na montaxe do guindastre de celosía.

Finalmente existirá unha ou varias zonas de ocupación temporal, despexadas e de dimensións segundo as esixencias de obra, destinadas á descarga, provisión e preparación dos diversos materiais, así como para a localización de casetas de obra e servizos.

- Gabias.

Realízanse as necesarias para a canalización dos cables de evacuación da enerxía producida ata a subestación, así como para o tendido da rede de terras.

A traza da canalización eléctrica de media tensión discorrerá polo lateral dos viarios de acceso aos aeroxeradores, por norma xeral.

Para as gabias da rede de terras utilizaranse as canalizacións para cableado e as escavacións das cimentacións dos aeroxeradores, sobre as que se colocará o condutor.

- Arquetas.

Empregaranse arquetas prefabricadas de formigón.

- Subestación

Deséñase a plataforma da subestación con espazo suficiente para unha posición de reserva destinada á instalación dunha posición de liña, por se no futuro resultasen necesarias ampliacións da mesma, para permitir a conexión de nova xeración eólica na contorna.

- Edificio de control

O edificio dispoñerá dunha sala independente para as celas de media tensión e o transformador de servizos auxiliares (separado mediante unha reixa ou envolvente que impida o acceso a puntos de tensión), mando, medida, proteccións, control e comunicacións, outra para os equipos de control eólico do parque, outra para un pequeno aseo con vestiario, outra para o grupo electrógeno, unha que se utilizará como almacén, unha para sala de aceites e outra máis para control da subestación e os servizos auxiliares.

O edificio será dunha soa planta e realizarase mediante paneis prefabricados de formigón tipo sándwich de 20 cm de espesor mínimo con illamento térmico incorporado e acabado con chapado imitando a pedra. A cuberta será a dúas augas, prefabricada e con acabados imitando lousa ou tella do "país".

Bordeará ao edificio unha beirarrúa de 1,0 m de ancho, con acabado de canto rodado visto, con bordo de formigón de alta resistencia, recibida sobre soleira armada de formigón.

Por outra banda, o Estudo aporta un inventario ambiental onde recolle a caracterización do medio físico, biótico, perceptual, socioeconómico e cultural. Neste inventario, no apartado de hidroloxía, indícase que a poligonal do parque eólico sitúase na divisoria entre o ámbito competencial da Demarcación Hidrográfica do Miño-Sil e da Demarcación Hidrográfica Galicia-Costa. Ademais, enuméranse as afeccións á rede fluvial por parte das instalacións do parque eólico proxectado como se mostra nas seguintes táboas.





Denominación curso fluvial do ámbito	ID do Río	Demarcación	Infraestrutura afectada	Afección rede fluvial		
				DPH	Z. Servidume	Z. Policía
Rego de Amear	26002	Miño-Sil	Viario acceso	-	-	Sí
Tributario de Rego Amear	26001	Miño-Sil	Viario acceso	Sí	Sí	Sí
Rego da Fervenza	26005	Miño-Sil	Gabia	Sí	Sí	Sí
Rego do Muíño	1003788962	Galicia Costa	Gabia	Sí	Sí	Sí
Rego da Toca	100378896	Galicia Costa	Gabia	Sí	Sí	Sí
Rego da Toca	100378896	Galicia Costa	Viario acceso	-	-	Sí

Finalmente indicar que non se contempla a realización de ningunha vertedura ao dominio público hidráulico, nin de forma directa nin indirecta (por infiltración ao terreo) en ningunha das fases do proxecto.

INFORME:

Polo tanto, á vista da documentación aportada, procédese a informar os seguintes aspectos que se detallan a continuación, sen prexuízo das demais competencias que ten atribuídas este organismo de conca, e sen entrar a valorar outras consideracións técnicas, urbanísticas ou ambientais que non son obxecto deste informe.

Rede fluvial

O Parque Eólico Serra do Faro Ampliación II atópase situado dentro dos municipios de Rodeiro, Dozón, Piñor e San Cristovo de Cea, nas provincia de Pontevedra e Ourense, no territorio que se estende pola divisoria entre o ámbito de actuación da Demarcación Hidrográfica Galicia-Costa e o ámbito competencial da Confederación Hidrográfica do Miño-Sil. Os sistemas de explotación nos que se sitúa o parque eólico son o número 05 "RÍO ULLA E RÍA DE AROUSA (MARXE DEREITA)" (Demarcación Hidrográfica de Galicia-Costa), e o sistema de explotación "MIÑO BAIXO" (Confederación Hidrográfica do Miño-Sil).

Discorren próximos ás actuacións definidas na documentación de referencia, dentro da Demarcación Hidrográfica Galicia-Costa os seguintes cursos fluviais codificados por Augas de Galicia como Rego de Porto Xubín (2440370502), Rego do Muíño (24403703), Rego da Toca (2440370302) e Río Arnego (244037), así coma os seus afluentes, sendo todos eles tributarios do río Ulla (244), e dentro da Demarcación Hidrográfica Miño-Sil atópanse os cursos fluviais Rego de Amear (26002), Rego da Fervenza (26005), Rego sin nominar (26001) e os seus afluentes, sendo todos eles tributarios do Río Miño (27926). Os encoros máis próximos ao parque son os encoros de Belesar, Peares e Velle no río Miño (Confederación Hidrográfica do Miño-Sil) a máis de 17 quilómetros ao leste do parque proxectado.





Pódese consultar e contrastar todos os datos expostos neste apartado na web de Augas de Galicia <http://mapas.xunta.gal/visores/dhgc/>.

Vista a documentación presentada e segundo o visor de Augas de Galicia, consultada a rede fluvial de detalle actualizada 2019 da Demarcación Hidrográfica Galicia-Costa, o viario de acceso ao parque afecta á zona de policía do rego da Toca. Así mesmo, a gabiá de cableado cruza o rego da Toca e o rego do Muíño afectando a Dominio Público Hidráulico, Zona de Servidume e Zona de Policía.

A continuación enuméranse as afeccións ao medio hídrico da Demarcación Hidrográfica Galicia-Costa por parte das instalacións proxectadas, detectadas segundo o visor indicado e a documentación achegada:

Nº	Curso fluvial no visor de Augas de Galicia (capa rede fluvial detalle actualizada 2019 da Demarcación Hidrográfica Galicia-Costa).	Cruce / Zona de Policía	Tipo de afección á rede fluvial da Demarcación Hidrográfica Galicia-Costa descrita no EIA	Tipo de afección á rede fluvial da Demarcación Hidrográfica Galicia-Costa detectada no visor de Augas de Galicia na capa rede fluvial de detalle actualizada 2019 (Coordenadas UTM ETRS89 H29)
1	Rego do Muíño (24403703) tributario do río Ulla (244)	Cruce / Zona de Policía	Afección da gabiá de cableado entre os aeroxeradores 3 e 7 ao Dominio Público Hidráulico (Cruzamento), Zona de Servidume e Zona de Policía do Rego do Muíño (1003788962).	Afección de 212 metros da gabiá de cableado entre os puntos (584.837,67;4.713.762,41) e (584.642,33;4.713.839,62) ao Dominio Público Hidráulico (Cruzamento), Zona de Servidume e Zona de Policía do Rego do Muíño (24403703) tributario do río Ulla (244). O cruzamento do Rego do Muíño ten lugar no punto (584.736,53;4.713.805,96).
2	Rego da Toca (2440370302) tributario do río Ulla (244)	Cruce / Zona de Policía	Afección da gabiá de cableado entre os aeroxeradores 2 e 5 ao Dominio Público Hidráulico (Cruzamento), Zona de Servidume e Zona de Policía do Rego da Toca (100378896).	Afección de 555 metros da gabiá de cableado entre os puntos (586.919,46;4.714.465,48) e (586.947,49;4.714.206,02) ao Dominio Público Hidráulico (Cruzamento), Zona de Servidume e Zona de Policía do Rego da Toca (2440370302) tributario do río Ulla (244). O cruzamento do Rego da Toca ten lugar no punto (587.067,72;4.714.270,64).
3	Rego da Toca (2440370302) tributario do río Ulla (244)	Zona de Policía	Afección do viario de acceso ao parque eólico á Zona de Policía do Rego da Toca (100378896).	Afección do viario de acceso ao parque eólico entre os puntos (587.496,33;4.713.920,47) e (587.476,32;4.713.927,90) da beiravía dereita á 56 metros cadrados da Zona de Policía do Rego da Toca (2440370302) tributario do río Ulla (244).

Cómpre sinalar que no caso de que existan cursos fluviais cunha conca de aportación inferior a 1 km² ou calquera elemento susceptible de consideración como dominio público hidráulico,





seranlles de aplicación a normativa e lexislación de augas, tendo plena vixencia as prescricións establecidas para o dominio público hidráulico.

Para a execución de novos camiños de acceso, modificacións dos existentes ou construción de gabias que requiran actuacións localizadas en zona de dominio público hidráulico ou en zona de policía deberase solicitar autorización administrativa de Augas de Galicia.

Deberase cumprir o establecido no artigo 36 da Normativa do PHGC, e segundo o establecido no artigo 9.4 e 78 do RDPH solicitar autorización administrativa de Augas de Galicia. Á solicitude de autorización deberán unirse, ademais dunha memoria na que se describan técnica e construtivamente as obras, planos de planta, seccións tipo, e perfís transversais, onde se reflectan as actuacións a realizar e as marxes dos leitos dos ríos así como a zona de servidume e policía. Deberán igualmente definirse construtivamente os cruces dos leitos no caso de que se modifiquen os existentes, ou se realicen novos cruces. Nese momento procedemental poderase solicitar por parte de Augas de Galicia tanta documentación se considere necesaria.

Do mesmo xeito, indicar que no caso de que a superficie destinada a aloxar o campamento de obra e o punto limpo se sitúe en zona de policía, deberase solicitar autorización administrativa de Augas de Galicia.

Igualmente, no caso de que se realicen talas de árbores en zona de servidume, segundo o establecido no artigo 7 do RDPH se deberá solicitar autorización administrativa a Augas de Galicia.

Asemade, cómpre salientar que na documentación presentada non se indica o xeito en que se realizaría o cruce das gabias de cableado cos cursos fluviais, polo que este aspecto debe aclararse en caso necesario da súa execución, no momento procedemental da correspondente solicitude de autorización a Augas de Galicia, optando en todo caso pola metodoloxía construtiva que menor afección cause ao medio hídrico e ao seu entorno.

Destacar, en todo caso, que a lexislación sectorial de augas establece unha zona de servidume e policía en tódolos leitos públicos e en toda a súa lonxitude, con independencia da clasificación do solo e con independencia de que estean ou non grafados nos planos de ordenación. Segundo o establecido no artigo 9.4 e 78 do RDPH calquera actuación precisará autorización administrativa do Organismo de Conca independente doutra que teña que ser outorgada por outro Organismo da Administración.

Zonas protexidas

Analizada a documentación aportada, as actuacións propostas non atravesan ningunha das zonas protexidas recollidas no Catálogo de zonas protexidas do PHGC aprobado por R.D. 11/2016 de 8 de Xaneiro.

A información relativa ás zonas protexidas pódese consultar na páxina web de Augas de Galicia: <http://mapas.xunta.gal/visores/dhgc/>.

Salientar ao respecto das zonas protexidas do PHGC, que o Tramo de Interese de Especies Ameazadas denominados "RHo Arnego" e "Asneiro" atópanse a máis de 12 quilómetros ao norte e ao oeste das actuacións.





No tocante ás Zonas de Captación para Abastecemento Humano recollidas no PHGC, as máis próximas ás actuacións previstas as seguintes:

NOM_ZPROT	Tipo	Estado	Coordenada X (UTM ETRS89 H29)	Coordenada Y (UTM ETRS89 H29)	Observacións
Ruiriz	Subterránea	Existente	584.136,08	4.713.638,30	Localízase a 340 m das actuacións previstas
-	Subterránea	Futura	584.508,18	4.714.277,35	Localízase a 270 m das actuacións previstas

En canto as áreas protexidas a nivel europeo, destacar as Zonas de Especial Conservación (ZEC) "Monte Faro" (ES1120008) localizado a uns 2 quilómetros ao norte da poligonal do parque e "Pena Veidosa" (ES1130004) situada aproximadamente a 0,7 quilómetros ao leste da poligonal das instalacións.

Por outra banda, non hai ningunha Zona de Especial Protección para as Aves (ZEPA) nas proximidades do parque.

Deberase atender as prescricións feitas no PHGC sobre zonas protexidas, así como aos condicionantes establecidos polo Servizo de Conservación da Natureza.

Aproveitamentos hídricos

Na documentación aportada non se fai referencia a afeccións a captacións de auga. Consultado o Libro de Rexistro de Augas de Galicia, e **salvo erro ou omisión**, constan as seguintes captacións inscritas na contorna do ámbito da actuación dentro da Demarcación Hidrográfica Galicia-Costa:

Clave	Titular	Concello	Coord. X (Datum inscrición)	Coord. Y (Datum inscrición)
DH.B36.53661	Particular	Dozón	583.437	4.714.020
DH.A36.18060	Particular	Dozón	581.878	4.713.712
DH.B36.15495	Particular	Dozón	581.526	4.713.100
DH.B36.62924	Particular	Rodeiro	585.478	4.713.949
DH.A36.11599	Comunidade Usuarios	Rodeiro	586.900	4.715.115
DH.A36.55038	Particular	Rodeiro	582.405	4.714.845
DH.B32.74094	Particular	Piñor	586.086	4.713.153

Destacar, que no caso de afectar a algunha captación de augas inscrita, como consecuencia das actuacións propostas no proxecto obxecto de estudo, deberase contemplar a súa reposición.

O artigo 143 do Regulamento do dominio público hidráulico establece que toda modificación das características dunha concesión requirirá autorización administrativa previa do mesmo órgano outorgante e nos seguintes artigos detállase a tramitación das variacións de características consideradas como esenciais, como pode ser o cambio de punto de captación.



Consecuentemente co indicado no parágrafo anterior, o titular dos traballos deberá elaborar e facilitar aos afectados por esas reposicións toda a documentación necesaria para a tramitación da modificación da correspondente concesión.

Zonas inundables

Son zonas inundables, segundo o artigo 26 do PHGC, as delimitadas polos niveis teóricos que acadarían as augas nas enchentes de período estatístico de retorno de cincocentos anos, atendendo a estudos xeomorfolóxicos, hidrolóxicos e hidráulicos, así como de series de enchentes históricas e documentos ou evidencias históricas destas. Segundo o artigo 14 do RDPH, -tendo en conta a súa modificación operada polo Real Decreto 638/2016 (Boletín Oficial do estado do 29 de decembro)-, estes terreos compren labores de retención ou alivio dos fluxos de auga e carga sólida transportada durante as ditas enchentes ou de resguardo contra a erosión. Estas zonas declararanse nos lagos, lagoas, embalses, ríos ou regos.

Ademais, cómpre ter en conta que a cualificación como zonas inundables non alterará a cualificación xurídica e a titularidade demanial dos terreos.

A zona de fluxo preferente, segundo o definido no artigo 27 do PHGC e no 9 do RDPH, é aquela zona constituída pola unión da zona ou zonas onde se concentra preferentemente o fluxo durante as enchentes, ou vía de intenso desaugamento, e da zona onde, para a avenida de 100 anos de período de retorno, se poidan producir graves danos sobre as persoas e os bens, quedando delimitado o seu límite exterior mediante a envolvente de ambas as dúas zonas.

As inundacións producidas polas crecidas non ordinarias considéranse un fenómeno natural aleatorio de ocorrencia periódica, de intensidade e magnitude non previsible polo que teñen a consideración, no caso de producirse, de forza maior (Artigo 41 PHGC).

Para as zonas de fluxo preferente e as zonas inundables deberanse de respectar e recoller expresamente as prescricións recollidas do capítulo VII da Normativa do PHGC (Art. 26 – 41) Protección contra as inundacións. Deste xeito, segundo o artigo 30 "Contido dos instrumentos de planificación de carácter territorial ou urbanístico" deberanse incorporar á documentación do instrumento de planificación de carácter territorial ou urbanístico, naquelas zonas afectadas por Áreas de Risco Potencial Significativo de Inundación (ARPSIs), a seguinte documentación:

- Planos onde se reflicta, sobre a ordenación proposta, o dominio público hidráulico e as súas zonas de servidume e policía.
- Planos onde se reflicta, sobre a ordenación proposta, as zonas inundables.
- Planos onde se reflicta, sobre a ordenación proposta, as zonas de fluxo preferente.

Cabe destacar o seguinte:

No artigo 33 do PHGC recóllense as condicións nas que a Administración Hidráulica de Galicia poderá outorgar as autorizacións nas zonas inundables dentro da zona de policía.

No artigo 34 do PHGC indícanse unha serie de limitacións de usos para a zona de fluxo preferente. Deste xeito, segundo ese artigo, con carácter xeral non se autorizarán nesta zona unha serie de actividades (acampadas ou instalacións destinadas a este fin; a realización de construcións destinadas a vivendas; a execución de instalacións industriais ou edificacións nas que habitualmente haxa presenza de persoas; a construción de cerramentos e valados que





non sexan permeables; a realización de recheos ou amoreamentos de materiais de calquera tipo que provoquen unha redución significativa da vía de intenso desaugamento; execución de infraestruturas lineais deseñadas de modo tendente ao paralelismo coa canle, coa excepción das de saneamento, abastecemento e outras canalizacións subterráneas que en todo caso, salvo en zonas puntuais en que non exista solución viable, deberán situarse fóra da zona de servidume).

Do mesmo xeito cabe destacar que para obter a autorización de realización de calquera actividade na zona de fluxo preferente deberase achegar o seguinte: xustificación de que non se modifica de xeito significativo a zona de fluxo preferente, a zona inundable ou o réxime das correntes; xustificación da compatibilidade cos criterios e medidas preventivas que se establezan, se é o caso, no Plan de Xestión do Risco de Inundación e declaración xurada do solicitante no que exprese que coñece e asume o risco asociado ao desenvolvemento da actividade na zona de fluxo preferente e as medidas de protección civil aplicables.

Asemade, deberanse ter en conta as prescricións recollidas nos artigos 9 e 14 do RDPH, coas súas modificacións introducidas polo RD 638/2016. Tamén, -tendo en conta a modificación operada polo dito Real Decreto 638/2016-, deberase atender ao establecido nos novos artigos que se incorporan ao RDPH: 9bis, relativo ás Limitacións de usos na zona de fluxo preferente no solo rural; 9ter, que regula as condicións nas que se poden autorizar as Obras e construcións na zona de fluxo preferente en solos en situación básica de solo urbanizado; 9quater, que establece un Réxime especial en municipios con máis de 1/3 da súa superficie incluída na zona de fluxo preferente; 14bis, no que se establecen as Limitacións de usos do solo na zona inundable.

No artigo 9bis.3 recóllese expresamente que toda actuación na zona de fluxo preferente deberá contar cunha declaración responsable, presentada ante a Administración Hidráulica competente e integrada, no seu caso, na documentación do expediente de autorización, na que o promotor exprese claramente que coñece e asume o risco existente e as medidas de protección civil aplicables ao caso, comprometéndose a trasladar esa información aos posibles afectados, con independencia das medidas complementarias que estime oportuno aplicar para a súa protección. A dita declaración será independente de calquera autorización ou acto de intervención administrativa que teña que ser outorgada polos distintos órganos das Administracións públicas, con sometemento, ao menos, ás limitacións de usos que se establecen no artigo 9bis. En particular, estas actuacións deberán contar con carácter previo a súa realización, segundo proceda, coa autorización na zona de policía ou co informe da Administración Hidráulica. A declaración responsable deberá presentarse ante a Administración Hidráulica cunha antelación mínima dun mes antes do inicio da actividade nos casos nos que non fose incluída nun expediente de autorización.

Nos artigos 9ter e 9quater, engádese que, ademais do esixido no artigo 9bis.3, con carácter previo ao inicio das obras, o promotor deberá dispoñer do certificado do Rexistro da Propiedade no que se acredite que existe anotación rexistral indicando que a construción se atopa en zona de fluxo preferente.

No artigo 14bis.3, establécese que, nas zonas inundables, as administracións competentes fomentarán a adopción de medidas de diminución da vulnerabilidade e autoprotección. Ademais, o promotor deberá subscribir unha declaración responsable na que exprese claramente que coñece e asume o risco existente e as medidas de autoprotección aplicables ao caso, comprometéndose a trasladar esta información aos posibles afectados, con



independencia das medidas complementarias que estime oportuno adoitar para a súa protección. No artigo 14bis. 4, engádese que, con carácter previo ao inicio das obras, o promotor deberá dispoñer do certificado do Rexistro da Propiedade no que se acredite que existe anotación rexistral indicando que a construción se atopa en zona inundable.

O artigo 11 do Real decreto Lexislativo 1/2001, establece que os organismos de conca darán traslado ás Administracións competentes en materia de ordenación do territorio e urbanismo dos datos e estudos dispoñibles sobre enchentes, co obxecto de que se teñan en conta na planificación do solo, e en particular, nas autorizacións de usos que se acorden en zonas inundables.

Na páxina web de Augas de Galicia <http://mapas.xunta.gal/visores/dhgc/>, pódense consultar e descargar as ARPSIs (Áreas de Risco Potencial Significativo de Inundación), as manchas de inundación asociadas a distintos períodos de retorno e as zonas de fluxo preferente.

O ámbito de actuación non está afectado por ningunha ARPSI fluvial da Demarcación Hidrográfica Galicia-Costa.

Actuacións susceptibles de causar afeccións ao medio hídrico

No caso dos camiños, a drenaxe lonxitudinal e transversal debe cumprir o establecido no artigo 36 da Normativa do PHGC:

“Art.36: Obras de paso de infraestruturas de transporte

1. As pontes ou obras de drenaxe transversal dimensionaranse con carácter xeral para o período de retorno de 500 anos, salvo que a Administración hidráulica de Galicia admita outro período de retorno debidamente xustificado no proxecto da nova infraestrutura, atendendo ás peculiaridades da zona, a entidade do leito e das características da propia infraestrutura: tránsito, importancia...

2. As obras de drenaxe dimensionaranse de modo que non se produza acumulación dos escuramentos nunha determinada zona ou que non se engadan a unha valgada áreas vertentes superiores en máis dun 10 % á superficie da bacía propia. En todo caso, as obras de drenaxe transversal dimensionaranse para a enchente de T=500 anos, e debe xustificarse debidamente ante a Administración hidráulica de Galicia o uso dun período de retorno menor ou, no caso da drenaxe lonxitudinal, xustificando o período de retorno utilizado, atendendo ás peculiaridades da zona e ás características das infraestruturas (tránsito, importancia...), así como a súa afección ao dominio público hidráulico”.

Indicar que haberá de solicitarse autorización de vertido ante esta Entidade, de acordo co establecido no artigo 245 do RDPH, se se vai empregar unha depuradora ou unha fosa non estanca, así como localizar axeitadamente na documentación gráfica o punto de vertido e/ou fosa séptica.

Así mesmo, aínda que non se sinala nada ao respecto na documentación examinada, se houbese algún vertido haberá de solicitarse a correspondente autorización de vertido ante esta Entidade, de acordo co establecido no artigo 245 do RDPH.



Tamén haberase de solicitar, ante este organismo de conca, o uso privativo por disposición legal ou concesión administrativa de calquera pozo de auga, tal e como se sinala nos artigos 54 e 59 do TRLA.

Deberase solicitar a correspondente autorización de obras segundo o establecido nos artigos 9.4, 78 e 126 do RDPH onde se estableceran tódalas condicións específicas que procedan no exercicio das función de tutela que corresponden a Augas de Galicia, así como as modificacións ou prescricións a ter en conta para que o proxecto sexa compatible coa preservación do medio hídrico.

No caso no que novos camiños de acceso ou as modificacións dos existentes se localicen en zona de policía deberase segundo o establecido no artigo 9.4 e 78 do RDPH solicitar autorización administrativa de Augas de Galicia.

Convén engadir que as obras que no seu día se desenvolvan, haberán de cumprir as condicións particulares deste informe.

Condicións particulares

Para os traballos a realizar, indicados no documento obxecto de informe, que se desenvolvan dentro do territorio Galicia Costa, en zona de servidume, así como os movementos de terras previstos, disporase de barreiras de retención de sedimentos e entre estas e os leitos dos ríos disporase un pano de xeotextil chantado ao terreo. Revisaranse periodicamente para repoñelas no caso de deterioro.

Prohíbese acumular sustancias, calquera que sexa a súa natureza e lugar en que se depositen, que constitúan ou poidan constituír un perigo de contaminación das augas (superficiais ou subterráneas) do Dominio Público Hidráulico e/ou de degradación do seu entorno.

Prohíbese o vertido directo ou indirecto de augas ou produtos residuais susceptibles de contaminar as augas continentais ou calquera outro elemento do Dominio Público Hidráulico sen a correspondente autorización de vertido. Deberase obter a preceptiva autorización para calquera novo punto de vertido á canle que puidera producir contaminación do dominio público hidráulico segundo o art. 245 do RDPH, relativo ás autorizacións de vertidos directos e indirectos.

Débense adoptar as medidas que garantan a estabilización de forma adecuada dos solos alterados polo tránsito de maquinaria evitando a erosión e posible arrastre de materiais ata os leitos.

Durante a execución dos traballos non se poderán utilizar as marxes dos ríos e ribeiras como lugares para o depósito de materiais, parque de maquinaria, lavados e, en xeral, todas aquelas actividades que supoñan un risco de contaminación das augas ou alteracións do ecosistema asociado.

Para o caso de execución dos alicerces e das gabias haberase de considerar non afectar á modificación dos niveles freáticos que puideran alterar captacións existentes aínda que estas non presentaran aparencia de afectación.



No caso da execución dos camiños de servizo, explanación de vellos camiños ou calquera obra de movemento de terras, en zona de policía, a empresa adxudicataria das obras deberá solicitar a correspondente autorización de obras.

Rematadas as obras, en tódalas aquelas zonas que dalgún xeito sufrisen unha degradación (tránsito de maquinaria en zona de policía) procederase á súa rehabilitación ata conseguir a reposición dos terreos ao estado primitivo.

Os residuos xerados durante a construción terán que ser trasladados a vertedoiro de residuos de construción autorizado e presentarse certificado deste traslado ao remate das obras.

Do mesmo xeito haberase de solicitar autorización para a extracción de prestamos en zona de policía de leitos.

Conclusión

Vista a documentación aportada en relación ao **Proxecto do Parque Eólico Serra do Faro Ampliación II** no relativo aos aspectos sobre os que se solicita informe, conclúese que non é previsible que o proxecto poida causar impactos ambientais significativos, tendo en conta as medidas protectoras e correctoras que o promotor prevé adoptar no documento ambiental presentado e as consideracións a tal efecto referidas no presente informe.

Sinalar que as instalacións proxectadas atópanse soamente en parte no ámbito territorial da Demarcación Hidrográfica de Galicia Costa, polo que se debería realizar a consulta á Confederación Hidrográfica do Miño-Sil.

Durante os procesos de execución dos traballos de desenvolvemento e implantación da actuación proposta, de cara a non afección ao dominio público hidráulico, deberán contemplarse as directrices sinaladas no presente informe, así como as indicadas nos documentos sometidos a informe.

Cómpre indicar que o informe emítese estritamente dende o punto de vista das competencias deste organismo de conca, sen entrar a valorar outras consideracións técnicas, urbanísticas ou ambientais que non son obxecto do mesmo, e sen prexuízo dos condicionantes que se poidan establecer nas preceptivas autorizacións de Augas de Galicia que se tramiten segundo o establecido nos artigos 9.4, 78 e 126 do RDPH.

Santiago de Compostela

A Xefa de Área de Autorizacións e Concesións-María C. Beneyto González-Baylin-(Sinatura Dixital).

O Subdirector Xeral de Xestión do Dominio Público Hidráulico-Roberto Arias Sánchez-(Sinatura Dixital).

